

VENDIM
Nr. 32, datë 27.3.2024

MBI PEZULLIMIN E VENDIMMARRJES SË BORDIT TË ERE-s LIDHUR ME SHQYRTIMIN E KËRKESËS SË SHOQËRISË “DRINI BULQIZË” SHPK PËR LICENCIMIN NË VEPRIMTARINË E PRODHIMIT TË ENERGJISË ELEKTRIKE

Në mbështetje të nenit 16, të ligjit nr. 43/2015, “Për sektorin e energjisë elektrike”, të ndryshuar; të nenit 14, pika 10, të “Rregullores për procedurat dhe afatet për dhënien, modifikimin, transferimin, rinovimin, njohjen dhe heqjen e licencave në sektorin e energjisë elektrike”, të miratuar me vendimin e Bordit të Entit Rregullator të Energjisë (ERE) nr. 109, datë 29.6.2016, të ndryshuar; si dhe të nenit 15 dhe të “Rregullores për organizimin, funksionimin dhe procedurat e ERE-s”, miratuar me vendimin e Bordit të ERE-s nr. 96, datë 17.6.2016; Bordi i ERE-s, në mbledhjen e tij të datës 27.3.2024, mbasi shqyrtoi relacionin me nr. 130/18 prot., datë 26.3.2024, të Drejtorisë së Licencimit, Autorizimeve dhe Mbikëqyrjes, “Mbi kërkesën e shoqërisë ‘DRINI BULQIZË’ sh.p.k. për licencimin në veprimtarinë e prodhimit të energjisë elektrike”,

konstatoi se:

- Shoqëria “Drini Bulqizë” sh.p.k., me shkresën e protokolluar në ERE me nr. 2417 prot., datë 17.11.2023, paraqiti kërkesën për pajisje me licencë për prodhimin e energjisë elektrike dhe Bordi i ERE-s, me vendimin nr. 354, datë 1.12.2023, vendosi të fillojë procedurën për licencimin e shoqërisë në veprimtarinë e prodhimit të energjisë elektrike nga HEC “Polemi”.

- ERE botoi njoftimin në median e shkruar për fillimin e kësaj procedure (në datat 2.12.2023 dhe 4.12.2023) dhe në përfundim të afatit të pritjes së komenteve apo objeksioneve nga të tretët (data 11.12.2023), nuk rezultoi të ketë të tilla. Ky njoftim u botua dhe në faqen zyrtare të internetit të ERE-s.

- Pas korrespondencës së zhvilluar me shoqërinë, nisur nga nevoja për të pasur kohën e mjaftueshme për shqyrtimin e dokumentacionit shtesë të depozituar nga ana e saj dhe/ose shkëmbimin e një korrespondence të mëtejshme me shoqërinë, Bordi i ERE-s, me vendimin nr. 381, datë 28.12.2023, vendosi të zgjasë deri në 30 (tridhjetë) ditë afatin për marrjen e vendimit përfundimtar për aplikimin e shoqërisë.

- Pas shqyrtimit të dokumentacionit shtesë të depozituar nga shoqëria, ka rezultuar se mbetet ende dokumentacion i paplotësuar dhe po ashtu ka lindur nevoja që vetë ERE t’i drejtohet me kërkesë për informacion Ministrisë së Infrastrukturës dhe Energjisë (MIE), Agjencisë Kombëtare të Mjedisit (AKM) dhe Agjencisë së Menaxhimit të Burimeve Ujore (AMBU).

- Në këtë rrethana, me vendimin e Bordit të ERE-s nr. 11, datë 29.1.2024, u vendos zgjatja me 30 (tridhjetë) ditë pune e vendimarrjes përfundimtare e Bordit të ERE-s, në lidhje me kërkesën e shoqërisë “Drini Bulqizë” sh.p.k. për licencim në veprimtarinë e prodhimit të energjisë elektrike. ERE, me shkresën nr. 130/8 prot., datë 5.2.2024, ka njoftuar shoqërinë për vendimin e Bordit nr. 11/2024, duke i evidentuar dhe dokumentacionin që mbetej ende pa plotësuar nga ana e saj.

- ERE, me shkresën nr. 130/7 prot., datë 5.2.2024, iu drejtua AMBU-së, në lidhje me statusin e rinovimit të lejes së përdorimit të burimit ujor dhe AMBU-ja në përgjigje, me shkresën e protokolluar në ERE me nr. 130/12 prot., datë 9.2.2024, ka informuar se “Drini Bulqizë” sh.p.k. ka aplikuar për rinovimin e lejes së përdorimit të burimit ujor dhe aktualisht ky aplikim është në fazën e trajtimit nga strukturat përkatëse në AMBU. Në këto rrethana, rezulton se “Drini Bulqizë” sh.p.k. nuk disponon aktualisht një leje të vlefshme për përdorimin e burimit ujor për prodhim hidroenergjie nga HEC “Polemi”, por është në proces rinovimi të kësaj lejeje.

- Me shkresën nr. 130/9 prot., datë 5.2.2024, ERE i është drejtuar Agjencisë Kombëtare të Mjedisit, në lidhje me vlefshmërinë e VNM-së paraprak, edhe AKM-ja, me shkresën e protokolluar në ERE me nr. 130/14 prot., datë 16.2.2024, ka informuar ERE-n se nga verifikimi i bazës së të dhënave rezulton se ka dorëzuar raport monitorimi për periudhën korrik 2019–janar 2020... Subjekti “Drini Bulqizë” është inspektuar në datën 19.8.2019 dhe nuk rezulton të ketë

shkelje të kërkesave ligjore. Deklarata mjedisore apo vendimi për VNM-në paraprake për projektin e propozuar është e vlefshme për atë kohë sa është i vlefshëm dhe dokumenti i miratimit të zhvillimit përkatës për projektin. Për sa informuar nga AKM-ja e duke qenë se HEC është ndërtuar tashmë, rezulton se shoqëria nuk ka shkelur kërkesat ligjore të VNM-së paraprake.

- Me shkresën nr. 130/10 prot., datë 5.2.2024, ERE i është drejtuar MIE-s me kërkesën për informacion/qëndrim, në lidhje me ndryshimet përkatëse në vlerën e investimit dhe kohën e ndërtimit të HEC “Polemit”, në referencë të përcaktimeve të kontratës me nr. 119 rep., nr. 61/1 kol., datë 24.1.2018, ashtu si dhe për sa përcaktuar në raportin e AKBN-së, mbi testimin e kryer më datë 11.1.2024.

- Me shkresën e protokolluar në ERE me nr. 130/17 prot., datë 20.3.2024, MIE ka vënë në dijeni ERE-n mbi shkresën drejtuar shoqërisë “Drini Bulqizë” sh.p.k., ku në kuadër të monitorimit të kontratës për ndërtimin dhe shfrytëzimin e HEC “Polemi”, bën me dije se AKBN-ja, me shkresat e datës 15.2.2024 dhe 25.2.2024, dhe ka informuar MIE-n mbi gjendjen aktuale të hidrocentralit “Polemi” dhe mbi mospërmbushjen e detyrimeve kontraktuale nga ana e shoqërisë. Në përfundim, referuar këtyre shkresave, MIE ka kërkuar nga ana e shoqërisë përgjigjen me argumentet bindëse. Për sa përcaktuar në këtë shkresë, vlerësohet që ERE, përpara se të marrë një vendim përfundimtar në lidhje me licencimin e shoqërisë “Drini Bulqizë” sh.p.k., duhet të presë që MIE të dalë me një qëndrimin përfundimtar në lidhje me mospërmbushjen e detyrimeve kontraktore apo vlefshmërinë e kontratës nr. 119 rep., nr. 61/1 kol., datë 24.1.2018.

- Shoqëria, në zbatim të përcaktimeve të nenit 9, pikës 1.3, germës “a”, të rregullores, ka depozituar në ERE shkresën e datës 27.2.2024, të Drejtorisë Rajonale Tatimore Dibër, drejtuar subjektit “Drini Bulqizë” sh.p.k., në të cilën përcaktohet se, në përgjigje të kërkesës së datës 26.2.2024, të bërë nga shoqëria mbi gjendjen e detyrimeve të saj, subjekti “Drini Bulqizë” sh.p.k. nuk ka detyrime tatimore për llojin e tatimit të kërkuar nga ana juaj. Për sa më sipër, konstatojmë se kjo shkresë është depozituar në ERE vetëm në format elektronik dhe nuk rezulton që të jetë depozituar kërkesa që vetë shoqëria i ka drejtuar organit tatimor, për të kuptuar nëse në objektin e saj janë përfshirë dhe detyrimet ndaj organeve të sigurimeve shoqërore dhe shëndetësore, ndaj kjo pikë e rregullores nuk është plotësuar tërësisht nga shoqëria.

- Në nenin 66, pika 1, të ligjit nr. 44/2015, “Kodi i Procedurave Administrative të Republikës së Shqipërisë”, parashikohet se: “nëse organi publik që zhvillon procedurën përballet me një çështje, zgjidhja e së cilës është parakusht për zgjidhjen e procedurës dhe që përbën një çështje ligjore të pavarur, për zgjidhjen e së cilës është kompetent një gjykatë ose organ tjetër (“çështja paraprake”), organi publik që zhvillon procedurën administrative pezullon procedurën deri në marrjen e një vendimi të formës së prerë për çështjen paraprake dhe njofton palën në lidhje me këtë.”.

- Po ashtu, në nenin 14, pika 10, të “Rregullores për procedurat dhe afatet për dhënien, modifikimin, transferimin, rinovimin, njohjen dhe heqjen e licencave në sektorin e energjisë elektrike”, të miratuar me vendimin e Bordit të ERE-s nr. 109, datë 29.6.2016, të ndryshuar, parashikohet se: Bordi i ERE-s, rast pas rasti, pas fillimit të procedurës, mund të vendosë të pezullojë vendimmarrjen e tij.

- Për sa parashikuar nga KPA-ja dhe rregullorja, duke qenë se leja e përdorimit të burimit ujor për prodhimin e energjisë elektrike dhe qëndrimi/miratimi përkatës i MIE-s në kuadër të vlefshmërisë së kontratës së nënshkruar me shoqërinë “Drini Bulqizë” sh.p.k., përbëjnë dokumente thelbësore të kësaj procedure, vlerësohet të pezullohet vendimmarrja e Bordit për kërkesën e shoqërisë “Drini Bulqizë” sh.p.k. për t’u licencuar në veprimtarinë e prodhimit të energjisë elektrike, deri në depozitimin në ERE të: lejes së rinovuar të përdorimit të burimit ujor, qëndrimin përfundimtar të MIE-s, në lidhje me vlefshmërinë e kontratës nr. 119 rep., nr. 61/1 kol., datë 24.1.2018, “Për ndërtimin, shfrytëzimin dhe administrimin e HEC ‘Polemi’ me kapacitet prodhues 1.751 mw”, shkresën e DRT Dibër në format origjinal/fotokopje e njëzuar me origjinalin, si dhe vërtetimin që shoqëria nuk ka detyrime të pashlyera ndaj organeve të sigurimeve shoqërore dhe shëndetësore.

Për gjithë sa më sipër, Bordi i ERE-s

VENDOSI:

1. Të pezullojë vendimmarrjen e Bordit të ERE-s mbi kërkesën e shoqërisë “Drini Bulqizë” sh.p.k. për licencim në veprimtarinë e prodhimit të energjisë elektrike nga HEC “Polemi”, deri kur të depozitohet në ERE:

- a) leja e rinovuar e përdorimit të burimit ujq për prodhim energjie nga HEC “Polemi”;
- b) qëndrimi përfundimtar i Ministrisë së Infrastrukturës dhe Energjisë, në lidhje me vlefshmërinë e kontratës nr. 119 rep., nr. 61/1 kol., datë 24.1.2018, “Për ndërtimin, shfrytëzimin dhe administrimin e HEC ‘Polemi’ me kapacitet prodhues 1.751 mw”;
- c) shkresa e Drejtorisë Rajonale Tatimore Dibër, datë 27.2.2024, në format origjinal ose fotokopje të njësuar me origjinalin;
- d) vërtetimi që shoqëria “Drini Bulqizë” sh.p.k. nuk ka detyrime të pashlyera ndaj organeve të sigurimeve shoqërore dhe shëndetësore.

2. Ky vendim është objekt rishikimi në kuadër të depozitimit të secilit prej dokumenteve të përcaktuara në pikën 1.

3. Drejtoria e Licencimit, Autorizimeve dhe Mbikëqyrjes të njoftojë shoqërinë “Drini Bulqizë” sh.p.k. për vendimin e Bordit të ERE-s.

Ky vendim hyn në fuqi menjëherë.

Çdo palë e përfshirë në këtë procedurë mund t’i kërkojë ERE-s, brenda 7 ditëve kalendarike nga data e marrjes së vendimit, rishikimin e vendimit të Bordit në rast se ka siguruar prova të reja që mund ta çojnë Bordin në marrjen e një vendimi të ndryshëm nga i mëparshmi apo për gabime materiale të konstatuara. Për këtë vendim mund të bëhet ankim në Gjykatën Administrative Tiranë, brenda 30 ditëve kalendarike nga dita e publikimit në Fletoren Zyrtare.

Ky vendim botohet në Fletoren Zyrtare.

KRYETARE NË DETYRË
Erjola Sadushi